

皮子文藪

皮子文藪

湖北先正遺書集部

河陽盧氏填

始基育據明

仿宋本景印



唐皮日休文藪序

如京使金紫光祿大夫檢校司空兼御史大夫上柱國河東縣開國伯食邑九伯戶柳開撰讀皮子文其目曰藪凡藪者澤也又曰淵藪也以其事物萃集之也古國之大各有藪焉魯大野晉大陸秦陽陁宋孟諸楚雲夢吳越具區齊海隅燕昭余祁鄭圃田周焦護皆爲藪也謂是地之廣故以名之也魯晉秦宋楚吳越齊燕鄭周分里之不同各名以異之焉然一天地矣予謂皮子之名藪也疑爲以其文之衆作之藪也又疑爲若魯晉秦宋楚吳越齊燕鄭周以其文類不同各爲藪也是文之類雖不同而曰

數亦若魯秦宋楚吳越齊燕鄭周之數雖異而揔一
天地也都以文而統之是曰文數也疑而愛之觀其
首又無所序說遂盡而讀之見其數之爲意也霍山
爲賦之數首陽爲碑之數惰鼎爲銘之數易商君傳
爲讚之數周昌相趙爲論之數陵母爲頌之數心爲
歲之數移成均博士爲書之數三羞爲詩之數數之
于文不可盡舉若九詠十原決約其名幾尤者例而
取之也謂賦下題各也大野之下國之數焉霍山之下文之
數也孰謂皮子文數之義不曰是乎將不曰是即不
在此而在於彼也傳者得以取義焉

文藪序

唐皮日休撰

咸通丙戌中日休射策不上第退歸州來別墅編次
其文復將貢于有司發篋叢萃繁如藪澤因名其書
曰文藪焉比見元次山納文編于有司侍郎楊公浚
見文編歎曰上第汚元子耳斯文也不敢希楊公之
歎希當時作者一知耳賦者古詩之流也傷前王太
佚作憂賦慮民道難濟作河橋賦念下情不達作霍
山賦憫寒士道壅作槌花賦離騷者文之菁英者傷
於宏奧今也不顯離騷作九諷文貴窮理理貴原情
作十原太樂既亾至音不嗣作補周禮九夏歌兩漢

庸儒賤我左氏作春秋決疑其餘碑銘讚頌論議書
序皆上剝遠非下補近失非空言也較其道可在古
人之後矣古風詩編之文未俾視之粗俊於口也亦
由食魚遇鯖持肉偶騃皮子世錄著之于後亦太史
公自序之意也凡二百篇爲十卷覽者無誚矣

唐皮日休文藪目錄

唐皮日休

第一卷

賦

霍山賦

憂賦

河橋賦

桃花賦

第二卷

諷悼

九諷系述

正俗

遇謗

見逐

悲遊

憫邪

端憂

紀祀

捨慕

潔死

悼賈

反招魂

第三卷

雜著

十原系述

原化

原寶

原親

原已

原弈

原用

原謗

原刑

原兵

原祭

補周禮九夏系文

九夏歌九篇

春秋決疑十篇

第四卷

碑銘讚

文中子碑

咎繇碑

首陽山碑

春申君碑

劉棗強碑

汴河銘

藍田關銘

隋鼎銘

三老董公讚

易商君列傳讚

第五卷

文論頌序

補大戴禮祭法

祀瘡癘文

晉取陽樊論

秦穆謚繆論

漢斬丁公論

周昌相趙論

陵母頌

非沈約齊紀論

正沈約評詩

補泓戰語

獨行

法言後序

第六卷

箴

六箴序

心箴

口箴

耳箴

目箴

手箴

足箴

動箴

靜箴

酒箴

食箴

第七卷

雜著

讀司馬法

請行周典

相解

惑雷刑

悲摯獸

誚莊生

旌王宇

斥胡建

白門表

無項託

郢州孟亭記

通玄子栖賓亭記

第八卷

雜著

正尸祭

讀韓詩外傳

題叔孫通傳

題後魏釋老志

題安昌侯傳

趙女傳

何武傳

鄙孝議上篇

鄙孝議下篇

內辯

第九卷

書

移元徵君書

請韓文公配饗大學書

請孟子爲學科

移成均博士書

鹿門隱書六十篇

第十卷

詩

三羞詩三首

七愛詩序

房杜二相國

李太尉晟

盧徵君鴻

元魯山

李翰林

白太傅

正樂府十篇

卒妻悲

橡媪歎

貪官怨

農父謠

路臣恨

賤貢士

頌夷臣

惜義烏

誚虛器

哀隴民

奉獻致政裴秘監

秋夜有懷

喜鵲

蚊子

鹿門夏日

偶書

讀書

貧居秋日

閑夜酒醒

秋江曉望

旅舍除夜

過福上人舊居

陪江西裴公遊延慶寺

西塞山泊漁家

襄州春遊

送從弟歸復州

皮子世錄

唐皮日休文數目錄

唐皮日休文藪卷第一

賦

霍山賦

河橋賦

霍山賦

并序

憂賦

桃花賦

臣日休以文爲命士所至州縣山川未嘗不求其風
謠以頌以文幸上發輜軒使得採以聞六年至壽之
駢邑曰霍山山故岳也邑贅于陟至之二日離邑一
舍望乎嶽將頌之文也及見之則目乎顛手乎禪心
乎聳神乎瞽始欲狂其文寫其狀如丹青之不差也
頌其風文其謠如金石之永播也旣而其精怯然搏

敵躁然械囚紛然焚絲恍然墮空浩然涉溟幽然又
亦則知才智之劣如耄而加疾將杖而奔者於戲霍
山之靈哉霍山之靈哉將闕其神而愚之邪抑有所
達而託之邪其辰旣浹其精忽渝怯然而勝躁然而
適紛然而靜恍然而安浩然而濟幽然而愈如壯而
能決將陣而敵者於是狂其文寫其狀其詞曰

太始之氣有清有濁結濁爲山峻清爲岳其山厥臣
其岳惟君惟南之鎮曰霍爲尊岳之大與地角壯與
天勅勢荆豫華嵩青沂兗岱如垤而秀如塊而銳岳
之高千仞萬仞蒼蒼茫茫日月相避其光望之數百
里外爲天棟梁岳之尊端然御極聳然正位靜然而

聽凝然而視其體當中如君之毅其屬者如駢其拇
如枝其指若卑其儀若肅其位岳之氣其秀如春其
清若秋其翠如雲雲不能麗其色如煙煙不能鮮若
雨收氣爽丹青滿天岳之靈其神不朕其報如響若
雨用淫岳能霽之若歲用旱岳能澤之岳之德生之
育之煦之和之開藹滌卉萋萋迷迷藻纘數百里岳
之形有雲鶩鶩其勃如怒有泉烈烈其來如決叱豐
隆奔列缺轟然霹靂天地俱裂岳之異狀其勢如危
或不可支若不可維或仰而呀有如吮空或俯而拔
有如攫地其曉而東有如冠日其暮而西有如孕月
有水而脉有石而骨有洞而腹有罅而節或銳而勵

或斷而截或迴而馳或伍而折其經之怪之祥之詭
之千種萬類絜不可得而詳記因神狂不能自主迨
而寐夢一人絳衣朱冕怪兒魁形曰余祝融之相也
霍山余君之故治也爾賦之誠形矣勝矣怪矣典矣
然義有弗備帝俾余蒞夫古有五岳霍居其一所以
五岳相邇者唐虞之帝五載一巡狩一載而徧上以
覲侯下以存民侯有治者陟不治者黜民有寃者乎
窮者濟洎唐虞以降皆燔柴于霍我帝用饗其禮至
周旦策而命我與諸岳星列中國自漢之後乃易我
号而歸于衡故祝融遷都命余守霍今聖天子越唐
邁虞而廢巡罷狩余之封內有可陟可黜可平可濟

者是聖天子無由知之尔能以文請於職事之達者
易衡之号以歸於我請天子復唐虞陟黜之義故尔
之將賦余闕尔懷而不尔文帝曰有衡既遠有巡必
勞惟霍之邇斯号可復賦者能言胡不俾傳帝俾余
命尔錫尔文尔無忘也臣曰請惟神貺既覺而書嗚
呼異哉

憂賦

并序

草茅臣日休見南蠻不賓天下徵發民力將弊乃爲
賦以見其志詞曰

上自太古粵有民族顓若混命愚如視肉當斯時也
雖三王之道不能化五帝之澤不能沐迨乎混沌欵

起規視驕分其形也有精有神其心也有偽有真既
凋其質又秀其純有智有機有義有仁有怨有對有
悲有辛居人靈府者摠屬于神神之生也攝爽孕精
胎意嬰情不迹不朕無臭無聲不居于愚不侵于嬰
先物而動先人而行不注而溢不絲而縈神之居也
填曾塞臆冥冥默默靜如寐魘將語不得其遇如噎
其飲如食其輕者賸其重者殛神之行也其居幽幽
其行悠悠來不可抑去不可留其情如割其緒如抽
其剛爲憤其弱爲羞其子爲恨其孫爲愁入人之心
也如毒如螫如虔如劉不綸而漁不兵而蒐其堅也
龍泉不能割其痛也革荔不能瘳入人之懷也倘倘

佯佯隱隱遑遑牢然不勝悒若有亾威能制佚力可
摧剛乖人之性反天之常不喪而戚不役而忙不觸
而醉不馳而狂是知食鯨魚者不能已樹萱草者不
可忘儻懷如嘍鴟百喙者其人立傷入人之神也
昧人之精燥人之英癡然而作如病宿醒雖有王澄
之色必俛樂廣之神不清入人之首也歛從內熱鬱
而上結不勞膏沐自清其髮有久而釋者則其人也
冠絲簪雪入人之眉也於悒摧頽思不自裁動如葭
灰飛上眉來顰然無力自落金杯有積而未已者雙
眉之翠如一月不開入人之目也端坐日晏凝然忘
倦注睫直視外象不遍雖有芥藻之繡毛嬙驪姬列

於前昏如有事入人之耳也希希夷夷俯而不思殷
然滿耳其身如尸雖師曠之善聽苟入之也迅雷列
風亦不聞之入人之齒也噤其齒牙淡其含咀悲嗟
既已哆如餓虎雖有贖炙餽餼堆其前糲不可茹入
人四肢也如縶如維如勞如疲其力如柳弱不可支
苟甚者消骨枯髓奪色削飢其人也立不勝衣噫嗚
戲憂之甚也如斯向其入之也臣皆有之然猶未憂
何寔爲師既憂其身須憂其時苟肉食者謀失而藿
食者殃罹可不憂歟可不憂歟夫於政而疲於祿而
尸王道不宣皇綱不維元惡作矣大盜乘之是臣憂
也后妃之際陰教規矩夏德塗山周贊文母牝雞無

晨中饋有主苟奇表而不黜乃神器之可取宮掖紊亂奸邪麀聚文信爲相而私后董偃作庸而尚主其甚也漢成母以國循性周宣后將權授父是臣憂也儲右之選寔賢與良少海增潤重離益光輔導不至乃爲猖狂歎戾園之思子嗟臨江之憫王斯愛是即惡乃易彰其甚者愍懷死而晉亂房陵易而隋亾是臣憂也封宗王嫡所以賢親茅土足以繼其後印綬足以飾其身至乃割域中之土宇半天下之黎民王猶未足亂以遄臻其甚者篡則王倫孫秀殺則清河萬人是臣憂也輔之而王在忠與良致叔父於折木取太公於釣璜寵之極也其化爲權權之極也其化

爲強其甚者曹操以兵而上殿高澄抑帝而勸觴是
臣憂也內豎之臣乃寵乃綏豎刁亂齊之日伊戾禍
宋之時西漢則中令扇迹東京則鄭卿構基舉手天
轉切齒國危其甚者陳蕃以賢而陷矣何進用忠而
僂之是臣憂也賈誼愛時仕止於國傅桓譚非讖官
止於郡丞是臣憂也將在於軍君命不復知魏絳之
法行見條侯之令肅郭開受諫李牧就誅范雎一言
盜安被僂是臣憂也王臣蹇蹇言須逆耳治亂終書
善惡必紀趙盾終屈於董狐崔杼竟書於太史至有
陳象極言以族滅李雲上書而身死是臣憂也懸官
待賄命相取資崔烈作司徒之日曹嵩爲太尉之時

未搜巖穴莫訪茅茨秦繆旣誅於五穀桓魋將退於仲尼是臣憂也法今如網隨而補之肺石之上落人涕洟公孫鞅恢令之法嚴廷年掃墓之期是臣憂也命將與師夸力四夷旣侵嶺徼又定邊陲以無用之沙漠竭有限之民資是以先王謂之荒服後嗣謂之羈縻豈可使親帥並旅躬揮戰麾故漢高有白登之辱隋陽有鴈門之圍是臣憂也出警入蹕以示嚴肅非有事於名山即展義於羣牧故昭王游漢水以無歸宣帝幸中山而不復是臣憂也功作非宜奪民農時我蓋不窵我忝阻饒傾宮旣作阿房又施人旣怨矣鬼其泣之是臣憂也頭會箕歛關征市賦民之胥

怨無所赴，愬人厭進，修家爲積聚，卜式出於富人，弘羊拔於賈豎，是臣憂也。外戚之貴，上公是列，西漢則王根爲玉，山東京則郭況製金，宥國步將移，天澤未歇，不師殷鑒，尚遵覆轍，是臣憂也。大樂旣沒，淫聲是起，宋都已改，行人貪賄如斯，陳國一時，雄玉對後庭花，至死是臣憂也。先之而昌，後之而亾，先之者堯興，唐舜興，虞後之者癸喪，夏辛喪，商故王之憂國者，日旰不食，士之憂位者，載贄出疆，鶉居鷺食者，何汲汲孔席墨突者，何遑遑故臣之憂也。盡此而已矣。願陛下憂之，治可致樂，康道可躋，義皇則天下幸甚。

河橋賦 并序

咸通癸巳歲日休遊河觀橋之利不楫而濟美其事
著河橋賦其辭曰

西荒之外有崑崙山帝都之下豐隆在焉其表無際
其高破天河漢極北昭回相連分其坎德遂有河源
其出綿綿其流涓涓如帶是也濫觴信然始礪石以
作注終裂地以成川迨乎放勛之世重華之年其水
懷山其波浸天鼇怒則蹴翻五嶽鯨激則掉破百川
迅復欬而似曝湧湍潰而若煎漬地軸以摧矣爛天
輪而缺然草木則尾閭之外日月則沃焦之巔人民
死而爲介俛虫化而爲蠃有棄不績有麻不田此則
乘塏望萬里之淵且夫天地之前有河生焉則盤石

之神不能導而使歸海朴父之力不能疏而使爲川
豈非元命未降抑自上玄大聖未出大功未宣天之
作矣抑有由焉於是堯之心測然惘然咨其四嶽舉
爾所賢天之元命不自於鯀鯀雖作矣其功不全果
殛于山其罪昭然天之元命降而自禹禹旣作矣其
功如天於是禹之心憂然勞然股旣無胈過不入門
以已爲下以物爲先旣乘橈以即欂又隨山而濬川
導自積石至于龍門裂峯峒以風響斬巖而晝昏
破靈怪窟斷天地根分其注使不可潰修其流使不
可吞然後千巖萬壑雷吼電奔挾逆流而並瀉入渤
海以猶渾天下安流昏墊無憂禹功旣大舜禪克修

其功也與天優優其績也與河悠悠垂庶旣安九河
如箭濁不可鑿焱不可見渦若驚風浪如狂電若此
帝媯之世則其流也如絲如綫在昔典午之世也其
君寔良其臣孔臧念濟者之太勞乃致功而去航子
產之濟也不足比充國之奏也胡可方於是督斤斧
於梓匠下材幹於豫章造其舟也乃絙乃杠乃輿乃
梁功旣奪於利涉力可侔於巨防知禦鼃鼉者以妖
爲德聚魚鼈者以怪爲祥觀其步高於空履險於深
其形也若劔倚天外其狀也若龍橫水心其高也若
大虹之貫天風吹不動其壯也若巨鼇之墜海浪泛
不沉曙色霍開濟者相排如川失水一物時來蹄響

如雨車音若雷有賢有俊有隸有臺有貧有窶有貨
有財噫前王之道深有旨哉在水則河橋曉濟在陸
則四關盡開水之與陸一貫而來所以大同其軌廣
納其材豈梁之防乎抑聞三代之橋也不斤不斧不
徒不杠以道爲水以賢爲梁濟民者民不病溺濟世
者世不頽綱開之也通仁流義閉之也關淫限荒夏
之梁也曰湯殷之梁也曰昌周之梁也曰旦漢之梁
也曰光自漢之季國竊主折爲水者以降以強及隋
之世爲梁者唐故能濟民於萬方同軌於八荒是知
河橋之義也可以獻於天王

槀花賦

并序

余常慕宋廣平之爲相貞姿勁質剛態毅狀疑其鐵
腸石心不解吐婉媚辭然覩其文而有梅花賦清便
富艷得南朝徐庾體殊不類其爲人也後蘇相公味
道得而稱之廣平之名遂振嗚呼以廣平之才未爲
是賦則蘇公果暇知其人哉將廣平困於窮阨於躋
然強爲是文邪日休於文尚矣狀花卉體風物非有
所諷輒抑而不發因感廣平之所作復爲槿花賦其
辭曰

伊祁氏之作春也有艷外之艷萼中之萼衆木不得
融爲槿花厥花伊何其美實多儻隸衆芳緣飾陽和
開破嫩萼壓低柔柯其色則不淡不深若素練輕茜

玉顏半醺若夫美景妍時春含曉滋密如不幹素若
無枝姘姘婉婉天天怡怡或俛者若想或閑者如癡
或向者若步或倚者如疲或溫磨而可薰或矮嬌而
莫持或幽柔而旁午或捲冶而倒披或翹矣如望或
凝然若思或奔傑而作態或窈窕而騁姿日將明兮
似喜天將慘兮若悲近榆錢兮粧翠靨映楊柳兮顰
愁眉輕紅拖裳動則裊香宛若鄭姬初見吳王夜景
皎潔闌胡弄切然秀發又若常娥欲犇明月蝶散蜂寂
當閨脉脉又若姐已未聞裂帛或開故楚艷艷春暝
又若息媯含情不語或臨金塘或交綺井又若西子
浣紗見影玉露厭浥妖紅墜濕又若驪姬將譖而泣

或在水濱或臨江浦又若神女見鄭交甫或臨廣進
或當高會又若韓娥將歌歛態微動輕風婆娑暖紅
又若飛燕舞于掌中半霑斜吹或動或止又若文姬
將賦而思丰茸旖旎互交迤倚又若麗華侍宴初醉
狂風猛雨一陣紅去又若褒姒初隨戎虜滿地春色
堦前砌側又若戚姬死於鞠域花品之中此花最異
以衆爲繁以多見鄙自是物情非關春意若氏族之
斤素流品秩之卑寒士他目則目他耳則耳或以怪
而稱珍或以踈而見貴或有實而花乖或有花而實
悴其花可以暢君之心目其實可以克君之口腹匪
平茲花他則碌碌我欲修花品以此花爲第一懼俗

情之橫議我曰不然爲之則已我目吾自我耳吾耳
妍蚩決於心取捨斷於志豈於草木之品獨然信爲
國兮如此

唐皮日休文藪卷第一

唐皮日休文藪卷第二

諷悼

九諷系述

遇謗

悲遊

端憂

捨慕

悼賈

九諷系述

在昔屈平既放作離騷經正詭俗而爲九歌辨窮愁而爲九章是後詞人撫而爲之皆所以嗜其麗詞擅

正俗

見逐

憫邪

紀祀

潔死

反招魂

其逸藻者也至若宋玉之九辨王褒之九懷劉向之九嘆王逸之九思其爲清愁素豔幽挾古秀皆得芝蘭之芬芳鸞鳳之毛羽也然自屈原以降繼而作者皆相去數百祀足知其文難述其詞罕繼者矣大凡有文人不擇難易皆出於毫端者乃大作者也揚雄之文丘軻乎而有廣騷也梁竦之詞班馬乎其有悼騷也又不知王逸奚罪其文不以二家之述爲離騷之兩派也昔者聖賢不偶命必著書以見志况斯文之怨抑歟噫吾之道不爲不明吾之命未爲未偶而見志於斯文者懼來世任臣之君因謗而去賢持祿之士以猜而遠德故復嗣數賢之作以九爲數命之

曰九諷焉嗚呼百世之下復有修離騷章句者乎則
吾之文未過不爲乎廣騷悼騷也

正俗

粵句亶之薄俗兮其風狡而且苦吾欲以直道握其
邪心兮皆逞容而莫顧前誨行兮後止高諭仰兮下
俯咸爲吾之僕爲愚兮並以吾之嚮爲傴羗靈修之
乃吾知兮先職我而爲輔奈其臣之狺狺兮不知吾
之所撫吾欲以明喆之性辨君臣之分兮定文物之
數吾欲以正訐之道兮進忠賢而退姦豎吾欲以醇
釀之化兮反當今而爲往古吾欲以忖度之志兮定
觚圜而反規矩念僮覆之在位兮若梟羊之當路內

灼怛以爲儻兮復何知其所愬乃指天而鬱悠兮將
天奪乎國之祐永怒怒以何言兮將求知於吾祖

遇謗

有昉兮黠而謂之不潔有泉兮壅而謂之不決有蒞
兮輶而謂之不芳有軸兮鏗而謂之不轍聲咷唏以
無音兮氣鬱悒而空噎旣愨愨以憎懼兮又謾謾而
不訣誣彭祖以爲孺兮譎殤子以爲耄夥衆人之難
信兮擗夸者之不悅佞爲瘡兮何去姦爲疔兮莫劑
譏爲轡兮莫御謗爲玉兮何切斲旣膿而必烹兮木
方藁兮必折心轆轤以似車兮思綿綿而如舛手欲
動兮似拳足將行兮如綈旣不辨於顏跣遂一貫於

堯桀吾哀生之不逢兮奚至死而悒悒念帝座之不
燭兮胡交光於卷舌既何路以自辨兮遂沒齒而瘠
刺

見逐

靳尚之言兮美如孺子蘭之氣兮醜於醒既怒聯以
相向兮遂裹足而南征面愜愜以奚色兮心憐憐而
何情耳方聰兮忽睽目方視兮忽盲目方當午兮便
昊天方晝兮不明欲泣兮有血將啼兮失聲均靈修
兮似失出國門兮若驚軻識怨兮亦緩駟知愁兮復
鳴既徜徉兮夏水復眷戀兮南荆嗟予夙稟於大訓
兮涵漬骨之忠貞既質者之莫余容兮向重蒼而自

盟旣憐仁以憑義兮遂鉅信而規誠將真宰之不仁
兮胡爲役余以此生彼鸞斯以有賊兮固不能容乎
鶴鷗彼茨菘之叢穢兮固不能讓乎杜衡已矣乎國
無人兮莫我留將訴帝于玉京

悲遊

荷爲凋兮芰爲擢荃爲裊兮薜爲禕彈吾棹兮澧之
浦駐吾楫兮湘之湄悲莫悲兮新去國怨莫怨兮新
相思幽篁蕭兮靜晚清漪澹兮去遲湘君欲出兮風
水急帝子不來兮煙雨微芷旣老兮深約日將暮兮
紅菱朝浮乎鶻跪夕叫乎羈嶋搔漾漾兮不止漣悠
悠兮何之日出沒兮北渚雲依稀兮九疑旣無人以

辨余兮又何心而怨咨退不解其恫際兮進不知其
忸怩寒蜩怨而無聲兮古木淒其寡枝嗟吾魄之不
返兮千秋萬歲湘中馳

憫邪

慨天道之不明兮何獨生此大佞若猘踰之能冠兮
當一國而持柄見亂臣之反詐兮信其主以不競輟
已覆而又遵乞將翻而不整不思心腹之疾兮又玩
膏肓之病竟客死於咸陽兮終不作毒王之幸既養
醜以遺患兮遂倒鉞而授柄將諛臣之肆禍兮豈上
天之付命粵吾大以爲不可兮彼以災而爲慶儻靈
修之魄有知兮刷吾耻於下暝

端憂

有一美人兮端憂千喑萬怒兮曾不得以少休腸結
多以莫迴兮淚啼劇而不流王孫何處兮碧草極目
公子不來兮清湘滿樓汀邊月色兮曉將曉浦上蘆
花兮秋復秋天沉寥以似淬兮峯巉峩以如抽篔簹
颯兮兩岸杜若死兮霜洲遺余程兮澧之側整余陌
兮湘之幽望女頷兮秭歸夢懷宋玉兮荆門愁欲向
天以噉咷兮寸晷不可以少留不知吾魂之所處兮
末寔寔以悠悠

紀祀

山之巔兮水之涘桂爲祠兮蘭爲位執玉桴兮扣雷

鼓奠金盃兮滴浮蟻薦瓊芳兮望暮雲獻椒醑兮拜
寒水祝勝響以怪談兮巫妖治而魅醉波閃倏兮湘
君竹簫踈兮帝子曰將暮兮河伯秋正深兮山鬼神
之化兮何方人之艱兮至此胡不化其邪而爲正兮
胡不返其戾而爲義胡不轉其凶而爲興兮胡不易
其亂而爲治但血食於下國兮罪不少禋於有位吾
將乘青螭而駕白虬兮將謁帝而訴神之累請天弧
發鏃兮天棃行箠神速悔尤兮俾吾靈修而易志

捨慕

粵吾秉志兮潔於瑾瑜芬而德而芳其道兮榮於藤
蕪將興國以見罪兮擬佐王而蒙辜彼群小之茸茸

兮如慕鳧之螿蟬以大鵬爲爵兮以康瓠爲甌以袞
衣爲裸兮以黎丘爲墟以鄭姬爲醜兮以子產爲愚
以鮑焦爲貪兮以孔聖爲誣吾將奮鱗於大空兮奚
獨慕此江湖吾將發榮於蟠桃兮奚獨守此蒿蕪吾
將蕩其魄兮驟風軻與軋車謁帝於冥冥之天兮秉
其生殺之樞將飄飄以高逝兮亦何必懷此姦邪之
故都

潔死

堯死兮舜滅禹殄兮湯絕似玉兮將沉如金兮未沒
行以仁兮止以義生以貞兮死以潔念余曾不足以
蹈聖閫兮亦慕茲而自悅湘浦兮煙深沉江兮風切

顧影兮自憐撫躬兮永訣鬼慘兮天愁雨泣兮泉咽
竟汨沒以齋淪兮永幽憂而怫鬱湘之山兮未盡湘
之流兮不竭千秋兮愁雲萬古兮明月靈均之寃兮
孰能銷其氣靈均之愁兮孰能釋其結來者之目鑒
兮無致位於牙孽

悼賈

并序

余嘗讀賈誼新書見其經濟之道真命世王佐之才
也自漢氏革嬴高祖得於矢石不暇延儒人及爲天
子制缺度弛處華而夷是時獨有叔孫生能定朝儀
其制未悉唯生草其書欲以制屈諸侯推定正朔調
革輿服通流貨幣天不祐漢絳灌與謗竟枉其道出

傳湘沅生自以不得志哀屈平之放逐及渡沅湘沈
文以弔之故其辭曰

瞻九州而相君兮何必懷此故都噫余釋生之意矣
當戰國時屈平不用於荆則有齊趙秦魏矣何不捨
荆而相他國乎余謂平雖遭靳尚子蘭之讒不忍捨
同姓之邦爲他國之相宜矣然則生之見弃又甚於
平當漢時捨文帝則諸侯矣如適諸侯則新書之文
抑諸侯而尊天子也捨諸侯則胡越矣則新書之文
滅胡越而崇中夏也是以其心切其憤深其詞隱而
麗其藻傷而雅余悲生哀平之見弃又生不能自用
其道嗚呼聖賢之文與道也求知與用苟不在於一

時而在於百世之後者乎其生之哀平歟余之悲生歟吾之道也廢與用幸未可知但不知百世之後得其文而存之者復何人也咸通癸未中南浮至沅湘復沈文以悼之其辭曰

粵炎緒之媯綿兮其國度之未彰天錫生以命理兮冀其道之益光偉吳公之知賢兮道其名於文皇既轉啟以召之兮遂位之於上庠愍耄儒之眷愚兮對天問之不臧既群儒之讓俊兮馳其譽之煌煌嗟大漢之不緒兮蚪其賢於汗潢上下溷而不分兮議制削於驕王殺僂焚而不制兮斷梓胡其寇攘羗虜全以侵華兮曾不能以抑強餌其嗜之延延兮寔三代

之計良念五德之更承兮論噫結而不綱乃秉臆以
興說兮數用五而色尚黃又諸侯以開國兮輸其租
於咸陽曾不得以撫民兮俾其君兮何忘請紆綱以
乘印兮各馳化於所疆上旣悅而欲大用兮遭絳灌
與東陽道旣擯兮何明乃出傳於沅湘浮沉波之翕
泝兮或漾棹以夷猶望靈均之沒所兮顛其心之怛
怛臨汨羅之浩漾兮想懷沙之幽憂森摻蘿以翦鬱
兮時迸猶以相號霧雨暗乎北渚蝸蠖毒乎芳洲景
黯沮以不明兮若天悼乎離騷香依依兮杜若韻淒
淒兮篋笥山隱隱以掃空兮煙微微而淡秋嗟吾不
知所感兮淚憤恨以橫流當抱蠶於渺瀰兮曾無足

以少休旣莢亂以傷思兮又鶴鶴以動愁嗚呼哀哉
世旣不平頷吾道以爲非兮吾復何依蘋蘭憔悴兮
稂莠繁滋麟鳳匿迹兮梟獍騰威柘匠罷斧兮拙者
構之離婁閉目兮瞽者揚眉子都蒙袂兮敦洽騁姿
嗚呼哀哉亦先生之尤也貽其世之不可兮何不解
而去位又垂萬世之名取捨在此奚自謗於童叟兮
乃憫然而爲累蓋伊尹三就五就之心兮異其民之
可治奈惛惛以不悟兮又被之以非議幸一人之再
覺兮荅受釐之與義旣孱王以墮駕兮乃寃慟而已
矣評曰君不明兮莫我知幽都寂兮和涕歸文懸日
月兮俟後聖用之大故忽兮其何足悲

反招蒐并序

屈原作大招蒐

或曰景差作疑不能明

宋玉作招蒐皮子以爲

忠故不如守介而死奚招蒐爲故作反招蒐一篇以

辨之辭曰

承溟滓之命兮付余才而輔君君旣不得乎志兮余

飄飄而播遷余將蕩大空而就戒兮君又招余俾復

身余詣帝以請訣兮帝俾巫陽以筮云巫陽語余以

不可歸兮故作詞以招君乃下招曰君兮歸來故都

慎不可留些其君雄虺兮其民封狐些食民之肝鬲

以爲其肉兮摘民之髮膚以爲其衣些朝刀鋸而暮

鼎鑊兮上曖昧而下墨眉呆癡些君兮歸來故都慎

不可留些余昔爲比干之寃兮干僂而余去些未聞
于貧生以自招兮余竟繫其所處些君兮歸來故都
慎不可留些余昔爲伍胥之寃兮胥僂而余逝些未
聞胥貧位以惜生兮執屬鏤而不滯些君兮歸來故
都慎不可留些余昔爲弘演之寃兮演自殘而余行
些未聞演惜命以不死兮俾其義而益明些君兮歸
來故都慎不可留些帝命余以輔君兮亦以君之忠
介些今以忠而見聞兮尚盤桓而有待些將自富貴
而入羈旅兮其志乃悔些將戀骨肉而惜家族兮何
不自裁些梟食母而獍食父兮見禽獸之爲生苟凶
殘者眉壽兮實梟獍而同名些君乎慎勿懷故都之

戀歸來乎余爲君存千古忠烈之榮枯

唐皮日休文藪卷第二

唐皮日休文藪卷第三

雜著

十原系述

原化

原寶

原親

原已

原弈

原用

原謗

原刑

原兵

原祭

補周禮九夏系文

九夏歌九篇

春秋決疑十篇

十原系述

夫原者何也原其所自始也窮大聖之始性根古人

之終義其在十原乎嗚呼誰能窮理盡性通幽洞微
爲吾補三墳之逸篇修五典之墮策重爲聖人之一
經者哉否則吾於文尚有歉然者乎

原化

或曰聖人之化出於三皇成於五帝定於周孔其質
也道德仁義其文也詩書禮樂此萬代王者未有易
是而能理者也至于東漢西域之教始流中夏其民
也舉族生敬盡財施濟子去其父夫亾其妻蚩蚩囂
囂慕其風蹈其梱者若百川蕩滉不可止者何哉所
謂聖人之化者不曰化民乎今知化者唯西域氏而
已矣有言聖人之化者則戶以爲嗤豈聖人之化不

及於西域氏邪何其戾也如是曰天未厭亂不世世
生聖人其道則存乎言其教則在乎文有違其言悖
其教者即戾矣古者楊墨塞路孟子辭而闢之廓如
也故有周孔必有楊墨要在有孟子而已矣今西域
之教岳其基而溟其源亂於楊墨也甚矣如是爲士
則孰有孟子哉千世之後獨有一昌黎先生露臂瞋
視詬於千百人內其言雖行其道不勝苟軒裳之士
世世有昌黎先生則吾以爲孟子矣譬天下之民皆
桀民也苟有一堯民處之一堯民之善豈能化天下
桀民之惡哉則有心於道者乃堯民矣嗚呼今之士
率邪以禦衆握亂以治天下其賢尚尔則不肖者反

化之不曰難哉不曰難哉

原寶

或問或者曰物至貴者金玉焉人至急曰粟帛焉夫一民之飢須粟以飽之一民之寒須帛以暖之未聞黃金能療飢白玉能免寒也民不反是貴而貴金玉也何哉曰金玉者古聖王之所貴也其在舜典則曰修五玉也其在春秋則曰諸侯貢金九牧禹所以鑄鼎象物玉所以飾禮金所以備貢以斯爲貴貴不多乎曰舜取五玉以備禮禹鑄九金以爲鼎由言其禮不爲諸侯乎不爲人民乎苟無粟無帛是無諸侯與人民也則五玉九金豈徒貴哉如舜不修五玉禹不

鑄九金三代之祭祀不以玉貨賄不以金矣由是言之金玉者王者之用也苟爲政者下其令曰金玉不藏於民家如有藏者以盜法法之民不藏矣法旣若是民必貴粟帛弃金玉雖欲男不耕而女不織豈可得哉或者曰然

原親

能嗣其親不曰子乎吾觀夫今之世誨其子者必櫛肌笏骨傷愛毀性以爲教嗚呼孟子所謂古者易子而教誠有旨歟不能教其子者是遺其身者也不能得其親者是捨其族者也古之佞臣愛人之貴過於其親必捨而事之公子開方是也愛人之權過乎其

子必殺而循之易牙是也自茲已降爲夫強臣者將
欲奪人之宗必先殺已宗矣噫教尚不可况其殺歟
或曰均是親也均是害也則周公誅管蔡石碯殺石
厚叔向僂叔魚漢文流淮南可乎曰均是親也賢則
能嗣凶則能覆族均是害也周公不誅則佗人誅之
石碯不殺則佗人殺之叔向不僂則佗人僂之漢文
不流則佗人流之已刑則及一人佗刑則及其族此
聖賢所以惜其族也刑也者仁在其中矣

殺宗王莽殺
子宇是也

原已

能以心求道者不曰已乎能以心爲天子爲諸侯爲
賢聖者不曰已乎是已之重不獨重於人抑亦重於

道也嘗試論之能辱已者必能辱於人能輕已者必
能輕於人能苦已者必能苦於人爲顏孔者非佗寶
乎已者也爲盜賊者非佗殘乎已者也故古之士有
不出戶庭名重於嵩衡道廣於溟渤者敬於已而已
矣或曰所謂敬已者不曰不能害已乎如豎貂自宮
能敬已乎鮑莊刑足能敬已乎曰均是敬也均是害
也其媚與直不同也所謂敬於已者以道也害及已
者亦以道也或曰聖人汲汲於民至若堯如腊舜如
腊其勞至矣於已安乎曰勞者勞於心也勞一心而
安天下若禹者股無胈腫無毛其勞亦至矣勞者勞
於身也勞一身而安萬世者也古者有殺身以成仁

者况勞者歟嗚呼吾觀於今之世諂顏媮笑辱身卑
已汲汲于進如豎貂者幾希

原弈

問弈之原於或人或人曰堯教丹朱征丹朱之爲是
信固有其道焉皮子曰夫弈之爲藝也彼謀旣失我
謀先之我智旣虧彼智乘之害也欲利其內必先攻
外欲取其遠必先攻近詐也勝之勢不城池而金湯
焉負之勢不兵甲而犇比焉勝不讓負負不讓勝爭
也存此免彼得彼失此如蘇秦之合從陳軫之遊說
僞也若然者不害則敗不詐則亾不爭則失不僞則
亂是弈之必然也雖弈秋荐出必用吾言焉嘗試論

之夫堯之有仁義禮智信性也如生者必能用手足任耳目者矣豈區區出其纖謀小智以著其術用爭勝負哉堯之世三苗不服以堯之仁苗之慢堯兵而熠之由羅人殺鵠鵠獻人烹鯢鮪者矣堯不忍加兵而以命舜舜不忍伐而敷之文德然後有苗格焉以有苗之慢尚不加兵豈能以害詐之心爭僞之智用爲戰法教其子以伐國哉則羿之始作必起自戰國有害詐爭僞之道當從橫者流之作矣豈曰堯哉豈曰堯哉

原用

堯爲諸侯非求爲天子也擊之民用之舜爲鰥民非

求爲天子也堯之民用之或曰摯善亦堯乎曰亦堯而已矣曰摯與堯其民俱捨之則善惡奚分邪曰摯固不仁矣堯固仁矣堯仁如是民尚慕舜况有君惡於摯君道不如堯焉得民性哉故曰聖人不求用而民用之求用而聖人不用之曰若是則孔子奚不用魯曰用之則魯化不用之天下奚化

原謗

天之利下民其仁至矣未有美於味而民不知者便於用而民不由者厚於生而民不求者然而暑雨亦怨之祁寒亦怨之已不善而禍及亦怨之已不儉而貧及亦怨之是民事天其不仁至矣天尚如此况於

君乎况於鬼神乎是其怨讐恨讟徒倍於天矣有帝
天下君一國者可不慎歟故堯有不慈之毀舜有不
孝之謗殊不知堯慈被天下而不在子舜孝及萬世
乃不在於父嗚呼堯舜大聖也民且謗之後之王天
下有不爲堯舜之行者則民扼其吭捽其首辱而逐
之折而族之不爲甚矣

原刑

或曰丹朱爲諸侯舜爲天子丹朱有過舜誅之乎商
均爲諸侯禹爲天子商均有過禹誅之乎曰不也朱
均之爲國必有舜禹之吏翼而治之何容朱均得暴
其民也哉苟有過必諭之諭而不可奪其政如誅之

者去堯舜之嗣也焉有爲人臣而去其君嗣哉或曰
法家嚴而少恩周官有八議漢法有三章微八議也
雖然人可免以三章而親賢必刑何哉曰聖賢在世
不能無過以輕重議之耳如以謗刑刑之雖周孔其
可免諸

原兵

管子說蚩尤割廬山之金以鑄五兵說者或云蚩尤
古天子則炎黃繼命其間無蚩尤之運也案史記云
蚩尤與其大夫作亂如此爲庶人之暴者且庶人不
當有大夫日休以爲蚩尤乃黃帝之諸侯蓋其爲人
暴黃帝征而滅之如此爲庶人一夫之暴不足當天

子用兵也又明矣嗚呼昭然之理前賢憚之况大聖
之深旨哉

原祭

說者以蚩尤爲五兵每有師祭當祭蚩尤諱厥亂甚
矣皮子直以蚩尤爲黃帝逆亂之臣五兵直作於炎
帝固始苟自蚩尤始以其亂逆且不當祀况果不自
蚩尤蚩尤不道黃帝滅之又不當以不道充祀軒轅
五帝之首能以武定亂以德彼後君之師祭宜以軒
轅爲主炎帝配之於義爲允

補周禮九夏系文

周禮鍾師掌金奏凡樂事以鍾鼓奏九夏案鄭康成

注云夏者大也樂之大者歌有九也九夏者皆詩篇名也頌之類也此歌之大者載在樂章樂崩亦從而亡是以頌不能具也嗚呼吾觀之魯頌其古也亦久矣九夏亡者吾能頌乎去大樂既去至音不嗣頌於古不足以補亡頌於今不足以入用庸可頌乎頌之亡者俾千世下鄭衛之內窈窕冥冥不獨有大卷之一章者乎

九夏歌九篇

王夏之歌者王出入之所奏也

燿燿皎日欻麗于天厥明御舒如王出焉
燿燿皎日欻入于地厥晦厥貞如王入焉

出有龍旂入有珩珮勿驅勿馳惟慎惟戒
出有嘉謀入有內則繁彼臣庶欽王之式

王夏四章章四句

肆夏之歌者尸出入之所奏也

愔愔清廟儀儀衮服我尸出矣迎神之穀
杳杳陰竹坎坎路鼓我尸入矣得神之祐

肆夏二章章四句

昭夏之歌者牲出入之所奏也

有鬱其鬯有儼其彝九變未作金乘來之
既醑既酢爰棘爰舞象物既降金乘之去

昭夏二章章四句

納夏之歌者四方賓客來之所奏也
麟之儀儀不繫不維樂德而至如賓之娛
鳳之愉愉不篝不笈樂德而至如賓之娛
自篴及管我有牢醕自篴及篴我有貨幣
我牢不愆我貨不匱碩碩其才有樂而止

納夏四章章四句

章夏之歌者臣有功之所奏也

王有虎臣錫之鈇鉞征彼不慄一撲而滅
王有虎臣錫之圭瓚征彼不享一烘而泮
王有掌訝遠爾疆理王有掌客饋爾饗餼
何以樂之金石九奏何以錫之龍旂九旒

章夏四章章四句

齊夏之歌者夫人祭之所奏也
璽璽衡筭翬翬禴翟自內而祭爲君之則

齊夏一章章四句

族夏之歌者族人酌之所奏也
洪源誰孕䟽爲江河大塊孰埏播爲山阿
厥流浩漾厥勢嵯峨今君之酌慰我實多

族夏二章章四句

械夏之歌者賓既出之所奏也
禮酒既酌嘉賓既厚牘之爲奏
禮酒既竭嘉賓既悅應爲之節

禮酒既罄嘉賓既醒雅爲之行牘應雅三樂器也

襍夏三章章三句

鷺夏之歌者公出入之所奏也

桓桓其珪袞袞其衣出作二伯天子是毗

桓桓其珪袞袞其服入作三孤國人是福

鷺夏二章章四句

春秋決疑十篇

夫趙盾弑君莒僕殺父春秋顯書其過何則楚公子
國弑其君邾敖子駟弑其君僖公齊人弑其悼公各
以疾赴春秋皆書曰卒乎曰人之生也上有天地次
有君父君父可弑是無天地乃生人之大惡有識之

弘耻亦由漢書云律毋妻母之文聖人所不書是也
趙盾反不討賊董狐謂爲殺君莒僕以其寶來奔里
革謂其弑父斯二者罪名已彰仲尼承彰而書耳斯
三逆者弑君以疾赴仲尼非可誣也據赴而書者不
忍也故不忍也者耻在其中焉懲在其中焉夫春秋
弑君三十六其餘之逆亦據赴而書耳

夫趙孟以無辭伐國杞伯以夷禮來朝春秋皆貶之
曰人曰子何至其罪大者爲之隱其過小者必以書
之曰伐國無辭專君之命也君而可專孰有其國得
不貶之乎若不罪大者爲之隱推亡也其罪小者必
以書固存也

夫齊荼野幕之弑事起陽生楚靈乾谿之縊禍因常
壽而春秋歸罪於陳乞公子比者不其遠乎曰野幕
之弑罪歸陳乞陽生之罪可知矣乾谿之縊罪歸于
比常壽之罪可知矣春秋之旨譬酷吏決獄髡鉗之
刑尚猶不捨刀鋸之戮何自而逃

夫齊桓救衛不書狄滅晉文召王而云狩于河陽曰
狄實滅衛因桓救而獲全斯不滅矣文實召王因王
來而稱狩斯不召矣苟桓不能救衛文不能匡王必
書狄滅衛晉人召天王河陽矣故春秋之時滅人國
者多救人國者鮮仲尼旌其卹患也昔周者衆朝周
者鮮仲尼旌其勤王也夫哀八年及十三年公再與

吳盟皆不書

注云

盟不書

諸侯耻之故不錄也

吳表十三年

桓二

年公及戎盟于唐則書吳實華族其道夷也以強要盟不曰夷乎戎實夷族其道華也以道好盟不曰華乎故耻而不書懲也以戎而書勸也

夫桓二年書曰宋華督弑其君與夷及其大夫孔父僖十年又書曰里克殺其君卓及其大夫荀息夫君稱弑也而云及者是君臣無別也弑之者罪臣下也夫孔父以奪室見弑荀息以立君被誅是無辜之怨是以及壞之者何自臣及君也蓋貶華父與里克也俾孔父之死如與夷之死荀息之死如卓子之死及之者貴之也

夫姜氏淫奔子般夭酷魯之醜也諱之可也至如公
有晉葬爲齊所止爲邾所敗皆諱之者何曰周之有
葬魯送可也如晉以盟主而臣魯諱之者諱乎以諸
侯而事諸侯也諸侯有過則削地有逆則夷宗齊魯
一體諱之者諱乎以諸侯而正於諸侯也夫天下有
道小國事大國邾小國也而魯諱之者諱乎以大國
而敗於小國也

夫定六年鄭滅許男歸而哀元年又書許男與楚圍
蔡曰鄭實滅許而後或復之當復之時其赴不至於
魯故不書耳凡國有來赴者雖小必書宋之六鷗退
飛是也無來赴雖大亦闕晉之滅耿滅霍滅魏是也

夫楚實滅陳後復封之狄實滅衛後復全之斯亦許之類是也

夫春秋之旨獲君曰止誅臣曰刺殺其大夫執我行人鄭弃其師隕石宋五若斯者即古史之全文也奚在其筆削乎曰仲尼因魯史而修春秋是明不誣於人也又曰知我者亦以春秋罪我者亦以春秋其是之謂乎若揚子之草玄其數則易其文則玄是也

夫宋襄執滕子而誣之以得罪春秋則承赴而書何至魯之君也殺者五逐者二並闕而不書苟如是懲惡勸善何以的亂臣賊子何以知懼曰夫仲尼修春秋而依微其旨固有俟尔苟無丘明發決其奧廓通

其玄亦赴來而責實也非可誣也如自書其魯之殺
遂者則魯人攘羊仲尼證之也

唐皮日休文藪卷第三

唐皮日休文藪卷第四

碑銘讚

文中子碑

咎繇碑

首陽山碑

春申君碑

劉棗強碑

汴河銘

藍田關銘

隋鼎銘

新城三老董公讚

易商君列傳讚

文中子碑

天不能言陰騭乎民民不可縱是生聖人聖人之道
德與命符是爲堯舜性與命垂是爲孔顏噫仲尼之
化不及於一國而被於天下不治於一時而霈于萬

世非刪詩書定禮樂贊易道修春秋乎故孟子墨踵
孔聖而贊其道復乎千世而可繼孟氏者復何人哉
文中子王氏諱通生于陳隋之間以亂世不仕退于
汾晉序述六經敷爲中說以行教于門人夫仲尼刪
詩書定禮樂贊易道修春秋先生則有禮論二十五
篇續詩三百六十篇元經三十一篇易贊七十篇孟
子之門人有高弟者公孫丑萬章焉先生則有薛收
李靖魏徵李勣杜如晦房玄齡孟子之門人鬱鬱於
亂世先生之門人赫赫于盛時較其道與孔孟豈徒
然哉設先生生于孔聖世余恐不在游夏亞况七十
子歟惜乎德與命乖不及覩吾唐受命而歿苟唐得

而用之貞觀之治不在於房杜褚魏矣後先生二百
五十餘歲生曰皮日休嗜先生道業先生文因讀文
中子後序尚闕于贊述想先生封隧在所因爲銘曰
大道不明天地淪精俟物聖教乃出先生百氏黜迹
六藝騰英道符真宰用失阿衡先生門人爲唐之楨
差肩明哲接武名卿未逾一紀致我太平先生之功
莫之與京

咎繇碑

噫諄諄之命必歸于德盛者出不徒然上應運次命
代苟非相者數十祀翼出於一時者其運與命彼失
此得彼得此失咸在乎諄諄之命焉奚在歸乎德也

夫帝摯之德不盛于堯堯而得焉十六族之德不盛于舜舜而得焉至于咎繇德齊于舜禹道超乎稷啓禹薦于天不命而歿則諄諄之命奚歸乎嗚呼天何爲哉不付咎繇之命者將欲空受天下哉未必獨死咎繇也設咎繇得天下其暮必薦益益得天下其暮之薦必有其人自咎繇之降空授之主其暴民黷天者可忍言也哉太史公曰禹封咎繇之後于英六五年春日休自淝陵之江左道出英六城下因求遺實厥祀存焉乃絰馬于古木再拜于廟庭退而碑之請樅陽小尹刊于壁銘曰

惟天降聖不錫厥命一篇帝謨百王之鏡禹有奚過

薦之不定啓有令德受之而正已矣何傷明德逾盛

首陽山碑

天必從道道不由天其曰人乎哉大聖應千百年之
運仁發於祥義動於瑞上聖帝也次素王也莫不應
乎天地亘乎日月動乎鬼神或有守道以介死秉志
以窮生確然金石不足爲其貞澹然冰玉不足爲其
潔非自上古聖人不以動其心况常萬世富貴之士
哉斯自信乎道天地不可得而應者也嗚呼夷齊之
志嘗以神農虞夏形於言由是觀之豈有意於文武
哉然跡其歸周不從諫而死彼當求西伯也而得武
王也不曰得仁乎旣得仁而仁不取其諫則夷齊死

之宜矣太史公以其餓死責乎天嗚呼若夷齊之行
可謂道不由天者乎如不得仁而餓死天可責也苟
夷齊以殷亂可去而臣於周則周召之列矣奚有首
陽之阨乎若夷齊者自信其道天不可得而應者也
天尚不可應況於人乎况於鬼神乎

春申君碑

士以知己委用於人報其用者術苟不王要在強其
國尊其君也上可以霸略次可以忠烈無王術而有
霸略者可以勝人國無霸略而有忠烈者亦足以勝
人國春申君之道復何如哉憂荆不勝以身市奇計
不曰忠乎荆太子旣去歇孤在秦其信刑待袖若自

暑以當餒虎不曰烈乎然徙都於壽春失鄧塞之固
去方城之險捨江漢之利其爲謀已下矣猶死以吳
爲宮室以魯爲封疆春申之力哉當斯時也苟任荀
卿之術廣聖深道用之朞月荆可王矣卒以猜去士
以謗免賢於戲儒術之道其奧藏天地其明燭鬼神
春申且不悟况李園之陰謀豈易悟哉豈易悟哉

劉棗強碑

歌詩之風蕩來久矣大抵喪于南朝壞于陳叔寶然
今之業是者苟不能求古於建安即江左矣苟不能
求麗於江左即南朝矣或過爲豔傷麗病者即南朝
之罪人也吾唐來有是業者言出天地外思出鬼神

表讀之則神馳八極測之則心懷四溟磊磊落落真
非世間語者有李太白百歲有是業者彫金篆玉牢
竒籠怪百鍛爲字千鍊成句雖不追躅太白亦後來
之佳作也有與李賀同時有劉棗強焉先生姓劉氏
名言史不詳其鄉里所有歌詩千首其美麗恢贍自
賀外世莫得比王武俊之節制鎮翼也先生造之武
俊性雄健頗好詞藝一見先生遂加異敬將署之賓
位先生辭免武俊善騎射載先生以貳乘逞其藝於
野武俊先騎驚雙鴨起於蒲稗間武俊控弦弦不再
發雙鴨聯斃於地武俊歡甚命先生曰某之伎如是
先生之詞如是可謂文武之會矣何不立一言以讚

邪先生由是馬上草射鴨歌以示武俊議者以爲称
正平鸚鵡賦之類也武俊益重先生由是奏請官先
生詔授棗強縣令先生辭疾不就世重之曰劉棗強
亦如范萊蕪之類焉故相國隴西公夷簡之節度漢
南也少與先生游且思以見命列將以襄之髹器干
事賂武俊以請先生武俊許之先生由是爲漢南相
府賓冠隴西公日與之爲筆宴其獻酬之歌詩大播
于當時隴西公從事或曰以某下走之才誠不足污
辱重地劉棗強至衆必以公賓劉於幕吏之上何散
之如是公曰愚非惜幕間一足地不容劉也然視其
狀有不足稱者諸公視某與劉分豈有間然哉反爲

之惜其壽尔後不得已問先生所欲爲先生曰司功
椽甚閑或可承闕相國由是椽之雖居官曹宴見與
從事儀埒後從事又曰劉棗強縱不容在賓署承乏
於椽曹詘矣奚不䟽整其秩相國不得已而表奏焉
詔下之日先生不恙而卒相國哀之慟曰果然止椽
曹然吾愛客葬之有加等墳去襄陽郭五里曰柳子
關後先生數十歲日休始以鄙文稱于襄陽襄陽邑
人劉永高士也嘗述先生之道業嘗咏先生之歌詩
且歎曰襄之人只知有孟浩然墓不知有先生墓恐
百歲之後埋滅而不聞與荆棘凡骨溷吾子之文吾
當刊焉日休曰存旣撫實錄之何愧嗚呼先生之官

卑不稱其德宜加私謚然棗強之号世已美矣故不加焉是爲劉棗強碑銘曰

已矣先生祿不厚矣彼蒼不誠位既過於趙壹兮才又逾於祢衡既當時之有道兮非歿世而無名嗚呼襄陽之西墳高三尺而不樹者其先生之故塋

汴河銘

夫垂後以德者當時逸而後時美垂後以功者當時勞而後時利若然者守道之主雖恐德不美後時逸於已民也夸力之主唯恐功不及當時勞於已民也故天下也不逸不足守不勞不可去致其利害生於賢愚之主自古然耶則隋之疏淇汴鑿太行在隋之

民不勝其害也在唐之民不勝其利也今自九河外
復有淇汴北通涿郡之漁商南運江都之轉輸其爲
利也博哉不勞一夫之荷畚一卒之鑿險而先功巍
巍得非天假暴隋成我大利哉尚恐國家有淇汴太
行之役因獻纖誠是爲汴河銘

惟河瀾瀾循禹之軌厥有暴隋鑿通津泗晝泣疲民
夜哭溺鬼似赭流川如松貫地龍舟未故江都已弒
陳迹空存逝波不止在隋則害在唐則利嗚呼聖王
守此而已

藍田關銘

六年皮子副諸侯貢士之薦入京程至藍田關觀山

形關勢廻抱于天秀欲染眸危將驚魄噫將造物者
心是而加力邪不然者何壯觀若斯之盛也易曰王
公設險以守其國信矣哉若爲天下之樞機萬世之
閫闔者非茲關而莫守也因陳其規是爲藍田關銘
天鋪唐業地造唐關千巖作鑠萬嶂爲桎難圖其形
莫狀其秀雙扉未開天地如斗軋然晝啓人流如濟
似畫秦圖鋪於馬底嶮不可侵唯王之心矧夫茲關
獨可規臨

隋鼎銘

隋氏有鼎其器非古以詐爲金以賊爲鑄以虐火煎
四海以毒氣蒸九土天假唐力杠之仁地以澤撲虐

火以德銷毒氣既折其足又齧其耳噫戲聖王無畜
茲器

新城三老董公讚并序

在漢之取天下也三傑而已矣蕭何苦民力以給兵
韓信殺民命以騁戰功留侯設詭策以離秦項當其
時未聞仁義說于君者而董公乃論之以喪義帝至
使天下宗漢者爲其喪義帝也夫漢祖以曹參雖有
攻城野戰之功不如蕭何也信矣焉至于苦民力殺
民命設詭策反不若董公之功也哉如高祖爲天子
以公爲師友行其道於時其利可知矣公之道已行
於漢而不覩封賞之禮又當時史氏無一字以褒者

因爲讚以旌之

項氏狂攘賊我懷王天命未的孰存與亡皤皤董公
一言漢昌一人弑君天下皆傷一人哭君天下皆喪
項由是弱漢由是強扶義而征可知軒黃唱仁而戰
可知武湯用于天道折彼雄銜繫公之道與漢而光

易商君列傳讚

并序

商君者用於孝公制其法而秦給御其謀而魏敗
封邑未居轅刑以及嗚呼商君之臣秦雖不必盡是
然亦至矣大史貶之過實非以欺公子卬刑公孫虔
拒杜摯之說者乎然有一是亦足救斯非也余悲商
君忠而受刑因重述其行事以讚曰

商君之于孝公也一二見孝公不悟其說非皇王之
道行之難不及其身者乎斯公之罪也在商君有心
於是道不亦多乎當商君一二說孝公行之商君必
爲阿衡矣嗚呼卒以苛令特用自蒙於僂悲夫

唐皮日休文藪卷第四

唐皮日休文藪卷第五

文論頌序

補大戴禮祭法文

祀瘧癘文

晉文公取陽樊論

秦穆謚繆論

漢斬丁公論

周昌相趙論

陵母頌

非沈約齊紀論

正沈約評詩

補泓戰語

獨行

法言後序

補大戴禮祭法文

祭法曰法施於人則祀之咎繇作帝謨爲士師其道
參乎舜禹不曰法施於人乎何祀典之闕哉祭法曰

能禦大災則祀之堯舜之世山林蕃鳥獸暴益作虞也山林踈鳥獸鮮人民安不曰能禦大災乎何祀典之闕哉祭法曰以勞定國則祀之昔者周公輔武以寧殷亂佐成而立周業制禮樂立明堂不曰以勞定國乎何祀典之闕哉如以咎繇伯益之功小于舜禹不在祀典則契爲司徒而民成咎繇也冥勤其官而水死伯益也如以聖人制禮自有七廟不合列在祀典則文王以文治武王以武功周公也如皆以功列於民者則吾之先師仲尼邁德於百王垂化於萬世孰不若契爲司徒冥勤其官也哉日休懼聖人之文將亂而墜敢叅補而附之文曰咎繇能平其法以

位終益能立其功以讓禹政周公以文化仲尼以德成非此族也不在祀典

祀瘧厲文

昔夏后氏鑄鼎象物使民知神姦或魑魅之外魍魎之餘匿天命竊帝威不見形于鼎上者自夏后氏去繼爲禍於人間被之者始若處水鑑復若落炎井眩瞽熒惑視之累形聽音重聲骨節殆重如山已傾始或醒時奪人之情喪人之精兀若木偶昏如宿醒噫或飲食不節哀樂失所病于人者上則湯劑次則礦艾愈矣凡在是病者人也又非天也湯劑不可理礦艾不可攻嗚呼瘧之能禍人是必有知也既有知奚

不効神爲聰明正直不加崇於君子焉遂爲文祀而逐之曰

癘乎癘乎有事君不盡節事親不盡孝出爲叛臣入爲逆子天未降刑尚或竊生尔宜癘之有專祿恃威僭物行機上弄國權下戲民命天未降刑尚或竊生尔宜癘之有賣交取祿諂交結族一言不善禍發如鏃天未降刑尚或竊生尔宜癘之美曼之色媚於君側巧笑未足已亡于國天未降刑尚或竊生尔宜癘之柔佞之言惑于君前委順未足國步移焉天未降刑尚或竊生尔宜癘之四星之位奉于紫宸蕭牆禍起帝座蒙塵天未降刑尚或竊生尔宜癘之見災幸

又聞禍樂成含羞冒貴忍垢貪榮天未降刑尚或竊
生尔宜癘之癘乎癘乎尔目不盲尔耳不聾如向來
所陳奚不禍於其躬仁者必有厄義者必有窮見仁
義而勿癘遇姦佞而肆凶非唯去乎物患抑亦代乎
天功癘乎癘乎苟依吾言而若是吾將達尔于帝聰

晉文公不合取陽樊論

三代之賞臣下以爵不以地不以器迨夫後世君弱
臣侈撥去古法能立一功者先伺君地焉能立一勲
者先窺君器焉猶是於魯有三桓於齊有田常於楚
有白公是賞過有僭生焉甚者奪主從來尚矣且姬
之列侯守其本封勝其主爵錫之以鈇鉞分之以鍾

彝休感其民生殺於國其貴已極矣遇天下無事則
行其德化奉其貢職居則待乎巡狩行則赴於會同
遇天下有事則申之以鍾鼓行之以征伐上以定王
室下以正諸侯真侯伯之職業也是常節也苟周天
子有賜宜以德讓之豈當更受其地也苟讓不獲聽
受之者其爵可也其器可也且天子之地方千里則
不足以待諸侯諸侯之地旣侵天子之甸由削枝者
必反乎榦剝肉者必至乎骨何者勢使之然也如晉
文旣定襄王于郊鄆王勞之以地陽人不服晉侯圍
之乃辱其宗祊苦其人民虐其甥舅嗚呼 其亦
不仁矣是晉文雖有入天子之功而有凌天子之威

也當王之賜宜讓曰臣重耳以眇眇之德處專征之
任遇翟寇肆虐天王少違宗廟臣敢興下國之師煞
克臣定王室乃臣之常也不足賞也苟天王特念小
伐不實諸刑列唐叔之祚獲臣有奉爲賞厚矣苟以
畿內之地爲臣之邑是上濫其賜下僭其受也雖天
王之荐寵臣其若宗廟之靈百姓之心後世之罪何
而晉文曾不是讓又請隧焉豈內輕衰周之凌遲外
恃諸侯之強盛而爲邪殊不知周王之尚守乎典禮
也且王曰昔我先王之有天下也規方萬里焉以爲
甸服以供上帝山川百神之祀以備百姓疋民之用
且王之所賜田皆在周甸也王明知在甸內與乎晉

者是力不能制晉也如力足制晉肯以規方千里之內地與夫諸侯哉是王之語晉侯以規方千里者譏其受地也文公不悟卒而受之嗚呼文公之霸也有召君之譏請隧之僭不爲甚矣甚者在陽樊也

秦穆謚繆論

聖人務安民不先置不仁以見其仁焉不先用不德以見其德焉苟如是是見危者已墜而欲援觀鬪者將死而方救噫其亦不仁矣以高辛之仁化用一摯擊之不善天下之民捕堯以爲君以唐堯之仁化用一鮌鮌之不績天下之民讎禹以爲功夫如是摯之與鮌是高辛唐堯誠用之也非先置也推其誠而用

之人民尚倍之如是况先置者邪當晉獻嬖姬之亂後奚齊卓子之死餘重耳在翟夷吾居秦以秦穆之力制翟而安晉其能必矣夫重耳之賢也天下知之又其從者足以相人國如先立之必能誅亂公子去暴大夫翼德於成周宣化於汾晉而穆公乃取公子摯之言乃先置夷吾是爲惠公公之入也皆內外之賂誅本立之臣蒸先父之室故生民興誦死者無報卒身獲于秦而子殺於晉嗚呼致是也非晉人之罪秦人之罪也夫摯立八年不善而去鮪用三載弗績而誅况晉惠公之在位作宗廟之蠹蝸爲社稷之稂莠一立十五年其爲害也大矣今之學者以秦穆爲

繆尚疑其謚得斯文也可以謚繆爲定

漢斬丁公論

忠之爲稱也蓋欲委身以事主不以猜悞貳其心不以辯說貳其心不以疑懼貳其心者也有過諍於公不揚名於私豈猜悞之足入乎上有忌愈乎進不愈乎退豈辯說之足入乎上有間去懼乎心不懼乎事豈疑懼之足入乎夫苟祿恡生而仕者上有過言未息而懼乎誅諫未再而去乎位自以得古人三諫不從之義然幸其生貪其祿是猜悞而貳其心也上有忌必姦于心機媚于聲氣不思已之不聰而謂上之受謗不思想有未可而謂辯之足從必從辯而去

是辯說貳其心者也。上有間必佞彼愛取乎厚也。必
諂彼倖求其捨也。有愛不可佞倖不可諂。即苟而已
矣。是疑懼貳其心者也。嗚呼劉項之作也。淮陰不以
猜悞而去項乎。淮南不以疑懼而去項乎。曲逆不以
辯說而去項乎。去彼而就此。果謂忠乎。果謂不忠乎。
是利則存不利則亡者也。則丁公臨敵捨敵無殺誠
惻隱之仁者。豈有猜悞辯說疑懼者耶。有利則存不
利則亡者耶。與其不忠則彼三侯者。未可免鼎鑊之
誅。刀鋸之刑也。是高祖斬之。果不爲當。噫漢之初立
未爲無人。丁公就刑。未聞有一言而戾者。將固之命
也。悲夫。

周昌相趙論

夫剛柔之分在乎性得失之機繫乎用苟剛暴則勝柔柔又則勝剛物之常理也或用之以剛處柔以柔處剛其機必得矣如以剛處剛以柔處柔其機必失矣周昌之性剛也呂后之性剛也漢祖以百歲後以趙王如意爲憂故輟昌相趙嗚呼漢高之意非逞志於一時納慮於一諫而相昌乎不然何其用之失也如以昌之剛足固趙國則趙之兵甲能當漢乎是不可一也如以昌之剛足固趙王呂氏之徵王特一郵夫之力耳不可二也如以昌之節足以存趙不過乎死死則趙王就徵耳是不可三也卒使百歲之後如

意寃僂周昌憤死惜哉漢祖未崩前以周勃統南軍以昌領北軍以陳平爲謀主則呂后之令產祿之謀不能當臨大難而不迴秉大節而不墜者也苟使握軍政執相權昌能之其奈乎誤用

陵母頌

孔父稱唯小人與女子爲難養也夫女子之忠貞義烈或聞于一時小人之奸詐暴亂不忘於一息使千百女子如小人奸詐暴亂者有矣使千百小人如女子忠貞義烈者未之有也則安國侯之母也不以項強而劉弱俾子事項不以子背君而別事而有忿色對暴君而抗大節捨其生而踐死地嗚呼春秋書解

楊致晉君之命漢史稱周苛拒項籍之爵方諸陵母
誠未爲忠何者男子少服教壯行義忠義貞烈雖死
不辱鼎鑊在前而不懼鑽窄被體而無怨乃男子之
常事也至夫女子少隱惟薄壯執箕箒豈嘗熟於忠
貞義烈哉是女子之有是者由百物之有瑞者矣豈
易爲哉豈易爲哉

非沈約齊紀論

沈約作齊紀論云太廟四時之祭各以平生所嗜饗
之漢明帝夢光烈皇后明旦車駕至廟躬拂帷幄親
易粉澤前史以爲美談此亦先代之舊典也日休曰
薦饗之儀邊豆之數聖人之制定矣苟非通如周孔

不相訟襲者謂時有人乎無其人制之謂乎非也宜
矣修其書不正而反贊之謂乎妄也又宜矣夫屈到
嗜芟屈建薦之爲乎合禮曾嗜羊棗曾子不食之
謂乎不忍一隅之國禮文不備宜哉約以方之漢明
大孝過矣

正沈約評詩

周詩曰駟騶彭彭注曰駟馬白腹曰騶議者言上周
下殷沈約又云騶者蓋三家之色相勝又示周殷相
代也日休曰天之命也必以二德則文王自信矣何
爲不受殷禪哉詩曰文王受命作周又曰文王有明
德俾其率天下之義師取一隅之凶主南面於殷其

能昭昭矣然非人事不可也天時未可也豈不可謂
殷之賢人尚衆翼匡紂而易政也豈能以駟騶之色
示乎代殷哉嗚呼禪代之事符于天命必不可以駟
騶之色勝之也謂堯之運爲火歟則車服一當從其
色則堯不當乘白馬冠黃衣純衣也故聖人繼運
以德受禪以仁如以馬之色示于代殷則吾以聖人
用于左道矣或曰若然者奚著曰毛公悞箋沈約過釋

補泓戰語

宋襄公伐鄭楚伐宋而救鄭與楚會泓戰既濟未陣
司馬子魚請擊之公不以戰卒敗而退公羊氏以爲
文王之戰亦不過此日休補其文曰聖人制民患其

力不可禁也設法以刑之患刑之不可止也用武以
兵之兵之既出也民秉之爲格殺執之爲攻殘故聖
人施金鼓以節之用羽旄以飾之爲蒐狩以教之自
三代以降春秋之時禮樂之征弛掩襲之弊廣窮其
力者譬角觝者爭其勝負並驅者競其先後胡爲仁
讓哉文王聖人之至也雖以德化未聞不兵而獲者
然則伐犬夷征密須敗耆國伐崇侯虎襄公始戰齊
而納孝公次及于泓則云不禽二毛不以阻隘夫聖
人之愛民也班白不提挈又云一夫不獲其所豈能
區區於死地決其勝於人命哉較其戰也文王不爲
也噫公羊氏違丘明之旨爲文王之戰亦不過於此

罪也

獨行

士有潔其處介其止於世者行以古聖人止以古聖人不顧今之是非不隨衆之毀譽雖必不合於祿利適乎道而已矣要以今是我之非我非今之是彼知於我者聞毀適足譽不知我者聞譽適足毀昧然不顧其是非毀譽者用之嗚呼士之道得不顧其是非毀譽者用之則天下之治不啻半於淳古矣今之所譽者處以古聖人以今達者聞是則進聞非則退有愛者聞毀而踈之有不合者聞譽而洽之故道不加於世業鮮異於衆則其人貿貿於祿利嗤嗤於朝廷

望天下之治不啻於瀉古也難矣哉

法言後序

法言孝至之篇曰周公以來未有漢公之懿者說者以爲楊子遜僞新之美又以爲稱其居攝之前云嗚呼日月豈卒能遜莽乎未若無阿衡之稱也噫既有其文不能無其論吾得之矣在美新之文乎則雄之道於茲疵也